

Program

utroška sredstava utvrđenih u razdjelu 17. Budžeta Federacije Bosne i Hercegovine za 2021. godinu Federalnom ministarstvu energije, rudarstva i industrije „Tekući transferi i drugi tekući rashodi – Subvencije privatnim preduzećima i poduzetnicima“

Mostar, septembar 2021. godine

1. UVOD

Uticaj pandemije korona virusa Covid – 19 na privredu Bosne i Hercegovine znatno se osjeća i u 2021. godini, usljed ozbiljnih poremećaja na tržištu. Borba protiv korona virusa u Federaciji Bosne i Hercegovine je dodatno otežana, u odnosu na ostale zemlje iz okruženja, činjenicom da je svaki entitet vodi za sebe, a unutar Federacije Bosne i Hercegovine taj mehanizam je većim dijelom razvodnjen na deset kantona. Od početka pandemije korona virusa Covid – 19, Vlada Federacije Bosne i Hercegovine je pomno pratila situaciju kako na nacionalnom tako i na globalnom nivou. Vezano za navedeno, donesen je Zakon o ublažavanju negativnih ekonomskih posljedica („Službene novine Federacije BiH“, broj 28/20), koji je usvojio Parlament Federacije Bosne i Hercegovine na sjednici Predstavničkog doma od 02.04.2020. godine i na sjednici Doma naroda od 04.05.2020. godine, iz koga je proizašla i Uredbu o interventnim mjerama za podršku ugroženim sektorima privrede Federacije Bosne i Hercegovine u okolnostima pandemije COVID-19 („Službene novine Federacije BiH“, br. 74/20 i 21/21).

U cilju smanjenja štetnih posljedica kako za stanovništvo tako i za privredu, doneseno je niz mjera koje se mogu podijeliti na:

- interventne mjere koje se mogu provesti u kratkom roku i koje se uglavnom odnose na očuvanje zdravlja stanovništva,
- strateške mjere namijenjene za pomoć stanovništvu i privredi.

Federalno ministarstvo energije, rudarstva i industrije se aktivno uključilo u rješavanje problema u privredi, odnosno prerađivačkoj industriji. U strukturi Klasifikacije djelatnosti BiH 2010, Područje C označava prerađivačku industriju, a obuhvata oblasti od 10-33. Imajući u vidu da oblasti 10 (proizvodnja prehrambenih proizvoda), 11 (proizvodnja pića) i 12 (proizvodnja duhanskih proizvoda) pripadaju prehrambenoj industriji, koja nije u nadležnosti Federalnog ministarstva energije, rudarstva i industrije, to je ovim Programom obuhvaćeno područje djelatnosti koja pripadaju oblastima od 13-33 područja C - Prerađivačka industrija. Napominjemo da blast 33-Popravak i instaliranje mašina i opreme isključuje:

- čišćenje industrijskih mašina,
- popravak i održavanje računara i komunikacijske opreme,
- popravak i održavanje kućanskih proizvoda

2. PRAVNI OSNOV

- Strategija razvoja industrije tekstila, odjeće, kože i obuće u Federaciji Bosne i Hercegovine za period 2013-2023. godine ("Službene novine Federacije BiH ", broj 65/13);
- Strategija razvoja drvne industrije Federacije Bosne i Hercegovine za period 2016.-2025. godina („Službene novine Federacije BiH“, broj 70/18);
- Strategija razvoja industrije građevinskog materijala Federacije Bosne i Hercegovine za period 2018.-2025. godine („Službene novine Federacije BiH“, broj 70/18);

- Strategija razvoja metalnog i elektro sektora Federacije Bosne i Hercegovine za period 2016.-2025. godine („Službene novine Federacije BiH“, broj 70/18);
- Akcioni plan za period 2019.-2023. godine za realizaciju Strategije razvoja industrije tekstila, odjeće, kože i obuće u Federaciji Bosne i Hercegovine za period 2013-2023. godine (Zaključak V. broj 1239/2018 od 25.10.2018. godine).
- Strategija razvoja namjenske industrije u periodu 2012-2022. godine;

3. ZAKONODAVNI OKVIR PROVOĐENJA PROGRAMA

- Budžet Federacije Bosne i Hercegovine za 2021. godinu („Službene novine Federacije Bosne i Hercegovine“, br. 4/21 i 48/21);
- Zakon o izvršavanju Budžeta Federacije Bosne i Hercegovine za 2021. godinu („Službene novine Federacije Bosne i Hercegovine“, br. 4/21 i 48/21);

4. CILJ I NAMJENA PROGRAMA

Cilj provođenja Programa je očuvanje radnih mjesta kroz osiguranje podrške likvidnosti najugroženijim sektorima prerađivačke industrije koje su u nadležnosti Federalnog ministarstva energije, rudarstva i industrije (u daljem tekstu: Ministarstvo) za prevladavanje vanrednih okolnosti koje je izazvala pandemija COVID-19, u skladu sa općim i specifičnim kriterijima.

Sredstva se dodjeljuju u svrhu očuvanja radnih mjesta i osiguranja podrške likvidnosti korisnika finansijske pomoći i mogu se koristiti isključivo za pravdanje isplate minimalnih plaća sa svim pripadajućim porezima i doprinosima za period od 01.06.2021. godine do 31.12.2021. godine.

5. KORISNICI SREDSTAVA

Ovim Programom uređuju se uslovi za ostvarivanje finansijske pomoći privrednim društvima u Federaciji Bosne i Hercegovine u okolnostima pandemije, način osiguranja finansijskih sredstava za dodjelu finansijske pomoći, namjena i postupak dodjele finansijske pomoći, opći i specifični uslovi za dodjelu, korisnici finansijske pomoći, kao i nadzor nad utroškom finansijskih sredstava i način izvještavanja.

Korisnik finansijske pomoći može biti privredno društvo koje kumulativno ispunjava sljedeće kriterije:

1. Korisnik pomoći je privredno društvo osnovano po Zakonu o privrednim društvima („Službene novine Federacije BiH“, broj 81/15),
2. Korisnik pomoći je privredno društvo sa sjedištem u Federaciji Bosne i Hercegovine,
3. Korisnik pomoći je privatno privredno društvo, odnosno privredno društvo sa većinskim učešćem privatnog kapitala (privredno društvo u kojem privatno/a lice/a ima/ju udio u vlasništvu u iznosu, najmanje, 50% plus jedna dionica),
4. Korisnik pomoći je:

4.1. ostvario pad ukupnog prihoda od najmanje 10% za period 01.01.2020.-31.12.2020. godine u odnosu na ukupan prihod ostvaren za period 01.01.2019.-31.12.2019. godine. Za privredna društva koja posluju kraće od 12 mjeseci u 2019. godini potrebno je dostaviti i dokumentaciju o ukupnom prihodu u 2020. godini za isti

vremenski period za koji su dostavljeni podaci za 2019. godinu, kako bi bili uporedivi, odnosno kako bi se dokazao pad ukupnog prihoda za određeni period, u iznosu od 10% i više. Dokument treba biti ovjeren i potpisan od ovlaštenog lica privrednog društva.

ili

4.2. da je izvoznik, što znači da je privredno društvo ostvarilo izvoz (prihodi od prodaje roba i učinaka na stranom tržištu) preko 30% od ukupnog prihoda ostvarenog u 2020. godini za koju su dostupni službeni godišnji finansijski izvještaji društva,

5. Korisnik pomoći je privredno društvo kome je prema KD BiH 2010 glavna šifra djelatnosti (djelatnost koju pravno lice pretežno obavlja) dodijeljena od nadležnog Zavoda za statistiku, iz područja C-Prerađivačka industrija, izuzev oblasti:

- 10 (Proizvodnja prehrambenih proizvoda);
- 11 (Proizvodnja pića);
- 12 (Proizvodnja duhanskih proizvoda),

6. Da nema neizmirenih obaveza po osnovu direktnih i indirektnih poreza.

6. KRITERIJI ZA IZBOR KORISNIKA

Visina iznosa koji se dodjeljuje kao finansijska pomoć privrednom društvu, izračunava se u odnosu na broj radnika u privrednom društvu (ukoliko privredno društvo ima i podružnice, za izračunavanje ukupnog broja radnika u privrednom društvu u obzir se uzimaju radnici matičnog privrednog društva i radnici podružnica na cijeloj teritoriji Bosne i Hercegovine) na dan 31.08.2021. godine. Zatim se izračuna ukupan broj radnika koji su na dan 31.08.2021. godine zaposleni u privrednim društvima čiji su zahtjevi proglašeni formalno ispravnim zahtjevima. Raspoloživi iznos sredstava se podijeli sa dobivenim ukupnim brojem radnika, te se tako dobije iznos sredstava koji treba odobriti po jednom radniku. Dobiveni iznos sredstava po jednom radniku množi se sa brojem radnika u privrednom društvu i dobija se iznos finansijske pomoći za dodjelu privrednom društvu.

Ukoliko se prilikom izračunavanja utvrdi da je izračunati iznos za dodjelu privrednom društvu veći od maksimalno dozvoljenog iznosa, odnosno veći od 700.000,00 KM, privrednom društvu se dodjeljuje iznos finansijske pomoći od 700.000,00 KM. Višak sredstava preko 700.000,00 KM se vraća u ukupnu preostalu sumu novca za raspodjelu, dijeli na preostali ukupan broj radnika i po već utvrđenom načinu izračuna dodjeljuje pojedinim privrednim društvima. Ovaj postupak će se ponoviti svaki put ukoliko se desi da na osnovu utvrđenog izračuna, pojedino privredno društvo dobije iznos veći od 700.000,00 KM. Ovaj izračun se odnosi na sva privredna društva iz tačke 5., podtačka d) Programa.

Korisnik finansijske pomoći ne može smanjivati broj radnika /zaposlenika u periodu od 31.08.2021. do 28.02.2022. godine, izuzev ako se smanjenje radnika /zaposlenika desilo zbog „više sile“ (usljed smrti radnika/ zaposlenika, jednostranog raskida ugovora o radu od strane radnika/ zaposlenika, odlaska u penziju radnika/ zaposlenika i/ili isteka ugovora o radu na određeno vrijeme). Ako se smanjenje broja radnika/ zaposlenika desilo iz naprijed navedenih razloga, smatraće se da se promjena u broju

radnika/ zaposlenika desila opravdano. Ako se smanjenje radnika desilo zbog smrti radnika, jednostranog raskida ugovora o radu od strane radnika, odlaska u penziju radnika i/ili isteka ugovora o radu na određeno vrijeme, potrebno je dostaviti materijalni dokaz o istom.

7. SREDSTVA PREDVIĐENA ZA DODJELU

Ukupna raspoloživa sredstva za dodjelu finansijske pomoći sektoru prerađivačke industrije iznose 30.000.000,00 KM.

Navedena sredstva su grant sredstva Federalnog ministarstva energije, rudarstva i industrije (u daljem tekstu: Ministarstvo) i dodjeljivati će se po raspisanom Javnom pozivu.

Ukupan iznos finansijske pomoći jednom korisniku koji se dodjeljuje po ovom Programu ne smije prelaziti iznos od 700.000,00 KM.

Preduzeća po ovome Programu mogu ostvariti pravo na dodjelu sredstava samo po jednom podnesenom zahtjevu, odnosno ili da je korisnik pomoći ostvario pad ukupnog prihoda od najmanje 10% za period 01.01.2020.-31.12.2020. godine u odnosu na ukupan prihod ostvaren za period 01.01.2019.-31.12.2019. godine ili je privredno društvo ostvarilo izvoz preko 30% od ukupnog prihoda u prethodnoj godini za koju su dostupni službeni godišnji finansijski izvještaji društva.

8. TRAJANJE PROGRAMA

Program traje do utroška sredstava, a najkasnije do kraja fiskalne godine (odnosno do 31.12.2021. godine). Javni poziv za dodjelu finansijske pomoći će biti objavljen u najmanje dva dnevna lista, „Službenim novinama Federacije BiH“ i na web stranici Ministarstva.

Javni poziv ostaje otvoren 21 dan od dana zadnje objave. Finansijska pomoć privrednim društvima se dodjeljuje do 31.12.2021. godine, a isplaćuje se najkasnije do 31.01.2022. godine.

9. TIJELA NADLEŽNA ZA PROVOĐENJE PROGRAMA

Tijela nadležna za provođenje i nadzor nad namjenskim korištenjem sredstava po ovom Programu su Ministarstvo i Federalno ministarstvo finansija/financija, svako u okviru svoje nadležnosti.

Ministarstvo učestvuje u postupku pripreme i objave javnog poziva za dodjelu sredstava, selekcije i ocjenjivanja formalne ispravnosti prijave, dodjele finansijske pomoći po utvrđenim kriterijima, javnog objavljivanja rezultata, ugovaranja dodjele finansijske pomoći, izvještavanja, praćenja namjenskog utroška i evaluacije učinaka.

Ministarstvo je dužno pridržavati se Smjernica o minimalnim standardima dodjele budžetskih sredstava putem transfera i subvencija u Federaciji Bosne i Hercegovine („Službene novine Federacije BiH“, broj 15/18). U skladu s tim, Federalni ministar energije, rudarstva i industrije će formirati sljedeće komisije:

- Komisija za pripremu i provođenje javnog poziva za realizaciju Programa utroška sredstava utvrđenih u razdjelu 17. Budžeta Federacije Bosne i Hercegovine za 2021. godinu Federalnom ministarstvu energije, rudarstva i industrije „Tekući transferi i drugi tekući rashodi - Subvencije privatnim preduzećima i poduzetnicima“ (u daljem tekstu: Komisija za selekciju),
- Komisija za izračun finansijske pomoći dodijeljene putem javnog poziva za realizaciju Programa utroška sredstava utvrđenih u razdjelu 17. Budžeta Federacije Bosne i Hercegovine za 2021. godinu Federalnom ministarstvu energije, rudarstva i industrije „Tekući transferi i drugi tekući rashodi - Subvencije privatnim preduzećima i poduzetnicima“,
- Komisija za praćenje i evaluaciju utroška sredstava dodijeljenih putem javnog poziva za realizaciju Programa utroška sredstava utvrđenih u razdjelu 17. Budžeta Federacije Bosne i Hercegovine za 2021. godinu Federalnom ministarstvu energije, rudarstva i industrije „Tekući transferi i drugi tekući rashodi - Subvencije privatnim preduzećima i poduzetnicima“.

10. PROVOĐENJE PROGRAMA

Sredstva se dodjeljuju na osnovu raspisanog Javnog poziva. Javnim pozivom će se definisati sljedeće:

- a) iznos raspoloživih sredstava za dodjelu finansijske pomoći ;
- b) vrijeme trajanja javnog poziva;
- c) namjena dodjele sredstava finansijske pomoći;
- d) način prijavljivanja za dodjelu finansijske pomoći;
- e) kriteriji za dodjelu finansijske pomoći;
- f) potrebna dokumentacija koja se prilaže uz zahtjev za dodjelu finansijske pomoći.

Javnim pozivom, od potencijalnih korisnika sredstava, će biti zatražena sljedeća dokumentacija:

1. Zahtjev za dodjelu finansijske pomoći (na memorandumu društva, kontakt telefon i službena e-mail adresa, sa popisom dokumentacije koja se dostavlja po Javnom pozivu),
2. Aktuelni izvod iz sudskog registra (original koji nije stariji od 30 dana od dana podnošenja zahtjeva za dodjelu finansijske pomoći),
3. Uvjerenje o poreznoj registraciji kod Porezne uprave – ID broj (ovjerena kopija sa ovjerom ne starijom od 30 dana od dana podnošenja zahtjeva za dodjelu finansijske pomoći),
4. Uvjerenje o registraciji obveznika poreza na dodatnu vrijednost – PDV broj (ovjerena kopija sa ovjerom ne starijom od 30 dana od dana podnošenja zahtjeva za dodjelu finansijske pomoći),

5. Obavještenje nadležnog zavoda za statistiku o razvrstavanju prema glavnoj šifri djelatnosti po KD BiH 2010 (ovjerena kopija sa ovjerom ne starijom od 30 dana od dana podnošenja zahtjeva za dodjelu finansijske pomoći),
6. Uvjerenje/potvrdu nadležne organizacione jedinice Porezne uprave Federacije BiH da nema neizmirenih obaveza po osnovu javnih prihoda zaključno sa danom podnošenja zahtjeva prema Poreznoj upravi, ili ukoliko ih ima, da je sklopljen sporazum o obročnom plaćanju duga i da se uredno izmiruju dospelje obaveze,
7. Uvjerenje/potvrdu nadležne organizacione jedinice UIO da nema neizmirenih obaveza po osnovu indirektnih poreza zaključno sa danom podnošenja zahtjeva prema UIO ili ukoliko ih ima, da je sklopljen sporazum o obročnom plaćanju duga i da se uredno izmiruju dospelje obaveze,
8. Zvanični finansijski izvještaj za 2020. godinu i za 2019. godinu, koji se sastoji od Bilansa stanja i Bilansa uspjeha (kopija ovjerena pečatom privrednog društva) za privredna društva koja podnose zahtjev na osnovu pada ukupnog prihoda od 10% i više za period 01.01.2020.-31.12.2020. godine u odnosu na ukupan prihod ostvaren za period 01.01.2019.-31.12.2019. godine ili zvanični finansijski izvještaj za 2020. godinu, koji se sastoji od Bilansa stanja i Bilansa uspjeha (kopija ovjerena pečatom privrednog društva) za privredna društva koja su ostvarila izvoz preko 30% od ukupnog prihoda u prethodnoj godini za koju su dostupni službeni godišnji finansijski izvještaji društva.
9. Izjavu, ovjerenu pečatom firme i potpisom ovlaštenog lica, da privredno društvo nije korisnik dodijeljenih budžetskih sredstava iz prethodnog perioda za koja je upućen nalog za povrat ili ukoliko jeste da je do dana podnošenja zahtjeva za dodjelu finansijske pomoći realizovao isti (priložiti dokaz o povratu),
10. Izjavu, ovjerenu pečatom firme i potpisom ovlaštenog lica, da privredno društvo nije bilo korisnik finansijske pomoći Federalnog ministarstva energije, rudarstva i industrije po „Javnom pozivu za podnošenje prijave za dodjelu finansijske pomoći izvoznim privrednim društvima u sektoru industrije“ u 2020. godini,
11. Izjavu, ovjerenu pečatom firme i potpisom ovlaštenog lica, da nakon 30.06.2021. godine nije isplaćena dividenda kroz dobit iz prethodnih godina, osim ako je dividenda isplaćena u obliku dionica korisnika pomoći,
12. Izjavu, ovjerenu pečatom firme i potpisom ovlaštenog lica, da je privredno društvo imalo pad ukupnog prihoda za period 01.01.2020.- 31.12.2020. godine u odnosu na ukupni prihod ostvaren za period 01.01.2019.- 31.12.2019. godine, sa izračunatim procentom. Za privredna društva koja posluju kraće od 12 mjeseci u 2019. godini potrebno je dostaviti analitičku karticu ukupnog prihoda u 2020. godini, za isti vremenski period za koji su dostavljeni podaci za 2019. godinu, kako bi bili uporedivi, odnosno kako bi se dokazao pad ukupnog prihoda za određeni vremenski period od 10% i više), ili Izjavu ovjerenu pečatom firme i potpisom ovlaštenog lica da je privredno društvo ostvarilo izvoz preko 30% od ukupnog prihoda u prethodnoj godini za koju su dostupni službeni godišnji finansijski izvještaji društva,
13. Izvještaj Centralne banke Bosne i Hercegovine kojim se dokazuje da glavni račun na koji se treba uplatiti finansijska pomoć, nije blokiran (navedeni Izvještaj koji se privrednom društvu dostavlja od strane Centralne banke BiH može biti i u elektronskoj formi, bez dodatne ovjere) ,
14. Lična karta i CIPS potvrda o prebivalištu lica ovlaštenog/ih za zastupanje (za strane državljane, koji su ovlašteni za zastupanje i koji ne posjeduju ličnu kartu i CIPS potvrdu o prebivalištu, treba dostaviti ovjerenu kopiju pasoša sa

naljepnicom za boravak i ovjerenu kopiju Rješenja o boravku izdatu od strane Službe za poslove sa strancima),

15. Spisak zaposlenika iz jedinstvenog sistema aktivnih osiguranika na dan 31.08.2021. godine, izdat od strane nadležne službe (original).

Svi traženi dokumenti trebaju biti originali ili ovjerene kopije ne starije od 30 dana od dana podnošenja zahtjeva za dodjelu grant sredstava, osim dokumenata za koje je izričito navedeno u kojoj formi se dostavljaju.

Zahtjev za dodjelu sredstava sa potrebnom dokumentacijom po Javnom pozivu, uvezanom i poredanom po tačkama Javnog poziva, podnosi se Ministarstvu, potpisan od strane ovlaštenog lica sa naznakom iz koje grane industrije se traže sredstva (Metalna, elektro i automobilska industrija; Industrija građevinskog materijala; Drvna, papirna i grafička industrija; Proizvodnja tekstila, kože i obuće, Hemijska industrija i industrije gume i plastike, Namjenska industrija).

Na osnovu provedenog Javnog poziva, Komisija za selekciju sačinjava preliminarnu listu korisnika za dodjelu finansijske pomoći i istu objavljuje na web stranici Ministarstva. Svi podnosioci zahtjeva za dodjelu finansijske pomoći imaju mogućnost da u roku od 7 dana, od dana objavljivanja iste na web stranici, ulože pismeni prigovor ili primjedbe na istu. Federalno ministarstvo energije, rudarstva i industrije je obavezno poduzeti sve potrebne aktivnosti za rješavanje prigovora u roku od 8 dana od dana prijema prigovora. Prigovor ne odgađa izvršenje odluke i nastavak provođenja postupka dodjele.

Nakon isteka roka za podnošenje prigovora, na prijedlog Komisije za selekciju, federalni ministar energije, rudarstva i industrije sačinjava Prijedlog odluke o dodjeli finansijske pomoći privrednim društvima i istu dostavlja Vladi Federacije Bosne i Hercegovine na razmatranje i usvajanje.

Odluka sadrži: naziv i sjedište korisnika finansijske pomoći, kanton kojem pripada korisnik finansijske pomoći, broj radnika i iznos dodijeljenih sredstava na ime finansijske pomoći.

Odluka se objavljuje u „Službenim novinama Federacije BiH“ i na web stranici Ministarstva.

11. KONTROLA UTROŠKA FINANSIJSKE POMOĆI

Zadaci Komisije za praćenje i evaluaciju namjenskog utroška finansijske pomoći su definisani Programom, Javnim pozivom, Rješenjem o formiranju komisije, te internim aktima koja se donose po potrebi. Komisija za praćenje i evaluaciju namjenskog utroška finansijske pomoći dužna je sačiniti Zapisnik o utrošku sredstava za svakog korisnika.

Ministarstvo sa korisnikom finansijske pomoći zaključuje Ugovor o dodjeli finansijske pomoći kojim se uređuju međusobna prava i obaveze. Ugovor, između ostalog, obavezno sadrži sljedeće elemente:

- ukupan iznos i namjenu sredstava koja se dodjeljuju,
- dinamiku i načine doznačavanja sredstava,
- obavezu korisnika pomoći da će po zahtjevu Ministarstva u roku od 15 dana od dana prijema zahtjeva izvršiti povrat nezakonito, odnosno nenamjenski utrošenih sredstava ili cjelokupan iznos dodijeljene finansijske pomoći u slučaju propuštanja korisnika da ispuni obavezu izvještavanja u ostavljenom roku,

- obavezu korisnika finansijske pomoći o izdavanju vlastite mjenice „bez protesta“ u svrhu osiguranja povrata neutrošenih ili nezakonito, odnosno nenamjenski utrošenih sredstava ili povrata cjelokupnog iznosa dodijeljene finansijske pomoći u slučaju propuštanja korisnika da ispuni obavezu izvještavanja u ostavljenom roku.

Korisnici finansijske pomoći koji su potpisali ugovor dužni su dostaviti resornom ministarstvu izvještaj o zakonitom i namjenskom utrošku sredstava, najkasnije do 31.03.2022. godine.

Neutrošena sredstva i/ili nezakonito odnosno nenamjenski utrošena sredstva korisnik finansijske pomoći je u obavezi vratiti u Budžet Federacije BiH, na JRT Budžeta Federacije BiH u roku od 15 dana od dana upućivanja zahtjeva/instrukcije za povrat sredstava od strane Ministarstva.

12. OBJAVLJIVANJE AKATA

Ministarstvo će ovaj Program, Odluku o usvajanju Programa i Odluku o dodjeli sredstava, objaviti u „Službenim novinama Federacije BiH“ i na web stranici Ministarstva: www.fmeri.gov.ba.

MINISTAR

Nermin Džindić